


T 1685 / 815-3

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 1 1938





唐太宗時林邑獻五色鸚鵡新羅獻美女
二人魏徵以為不宜受太宗喜曰林邑鸚
鵡猶能自言苦寒思歸其國况二女遠別
親戚乎拜鸚鵡各付使者而歸之



哈佛大學漢和
圖書館藏印

却獻懿規

漢文帝時有獻千里馬者文帝曰鸞旗在前屬車在後吉
行日五十里師行日三十里朕乘千里馬獨先安之於是
還其馬與道里費而下詔曰朕不受獻也其令四方無復
來獻建武詔曰郡國獻異味其大官勿復受遠方口實所
以薦宗廟自如舊制時異國有獻名馬者日行千里又進
寶劍價值百金詔以劍賜騎士馬駕鼓車夫帝王之富在
四海貢獻何足愛哉仁義之道若能時常討論則知福德
脩於天下其善繼善述爲至寶用賢教子爲明珠國祚自
然隆長稍有愛物存積之念則却貢之美談不足稱也

綱目

宋理宗紹定二年侍講范楷進講豐卦奏曰當豐盛之時聖人於諸爻有
壅蔽不明之憂帝首肯良久曰豐亨盛大之時侈心易生其後遂至徇情
肆欲窮奢極靡如秦皇漢武禍亂將作而不知此不可不戒也 君鑒



治慮方盛

夫人主學與不學係天下治亂如好學則天下之君子相與欣慕願立於朝以直道事上輔助德業而致太平矣如不好學則天下之小人皆動其心欲立於朝以邪諂事上竊取富貴而專權利矣故聖人爲戒必於方盛之時方慮衰則可以防其滿極而圖其未久至於既衰而後戒則無及矣自古天下之治未有久而不亂者皆由於因循怠傲不能戒於其盛也狃安富則驕侈生樂舒肆則紀綱壞忘禍亂則覺孽萌是以浸淫滋蔓而不知亂亡之相尋也噫君天下者可不勵精向學以爲久安長治之具哉

性理

魯哀公問政於孔子孔子對曰政之急莫大乎使民富且壽也省力役薄賦斂則民富矣敦禮教遠罪戾則民壽矣公曰寡人欲行夫子之言恐吾國貧矣孔子曰詩云愷悌君子民之父母未有子富而父母貧者也

家語



富民保國

國朝太祖諭侍臣曰保國之道藏富於民民富則親民貧則離民之貧富富國家休戚繫焉自昔昏主恣意奢欲使百姓困乏至於亂亡朕思微時兵荒饑饉日食藜藿今日貴為天子富有天下未嘗一日忘於懷故宮室器用一從朴素飲食衣服皆有常供惟恐過奢傷財害民也天道福善禍淫不言而見君有德則降祥不德則降災以警之故天之於君猶父之於子子不善而父警之安敢不懼蓋謹懼無違猶慮有非常之灾若恣肆不戒豈能免當然之禍朕每思念至此未嘗不惕然於心卿等皆當慎之

皇明寶訓

楚人有獻魚於楚王曰今日獲魚食之不盡賣之不售棄之可惜是故來獻
左右云鄙哉辭也楚王曰漁者仁人將以誨我也乃恤鰥寡存孤獨出倉廩發幣錢而楚國大治 太平御覽



納諫功成

夫古之為天下者何嘗不虛已訪言疇咨詢度擇令典而
 從人欲補闕政而成機務故帝堯有稽衆舍已之聽漢王
 有納善轉圜之美用能極羣臣之謀慮任四海之智力塞
 未然之咎立非常之功使下情無壅而芻蕘不遺大猷是
 經而全其王度者也東方朔有言談有悖於目拂於耳謬
 於心而便於身者有說於目順於耳快於心而毀於行者
 非明王聖主孰能聽之蓋君人者之用心當如水鑒之不
 將不迎然後忠邪立辨賢愚得用擇其善者聞斯行諸書
 云嘉言罔攸伏詩云王道如砥其直如矢是之謂也

冊府元龜

元仁宗謂侍臣曰卿等以朕居高位為樂朕惟太祖創業艱難世祖
 混一疆宇兢業守成恒懼莫能當天心繩祖武使萬方百姓樂得其
 所朕念慮在茲卿等固不知也 山堂肆考



創守難易

唐太宗問侍臣曰創業與守成孰難房玄齡曰草昧之初
羣雄並起角力而後臣之創業難矣魏徵云自古帝王莫
不得之於艱難失之於安逸守成難矣上曰玄齡與吾共
取天下出百死一生故知創業之難徵與吾共安天下常
恐驕奢生於富貴禍亂生於所忽故知守成之難然創業
之難已往矣守成之難方當與諸公慎之玄齡等拜云陛
下之言及此四海之福也且自古帝王創業而失之者少
守成而失之者多蓋禍亂未嘗不生於安逸游觀荒飲雕
麗奇巧暴殘物命亦未嘗不生於貨利淫縱之篤也

綱目

漢章帝時何敞為汝南太守帝南巡過郡有刻鏤屏風為帝張設
召命侍中黃香銘之曰古典務農雕鏤傷民忠在竭節義在脩身
敬懼禮賢命士改脩德化 綱目



崇儉抑奢

國朝太祖謂侍臣曰澹泊可以養心儉素可以養德縱欲
敗度奢侈移性故技巧哇淫遊幸畋獵皆役心損德之具
是以高臺深池庸主攸亡卑宮陋室聖主攸興朕觀元世
主在位躬行儉朴遂成一統之業至庚申驕淫奢侈飫梁
肉於犬豕致怨怒於神人故逸豫未終敗亡隨至此近代
之事可爲明鑑朕常以此訓諸子使知所警戒則可長保
國家矣處富貴正當抑奢侈弘儉約戒嗜欲以厭衆心猶
恐不足以慰民望况窮天下之技巧以爲一己之奉乎其
致亡也宜矣此亦足以示戒覆車之轍不可蹈也

皇明
寶訓

唐太宗謂侍郎王珪曰中書所出詔勅頗有意見不同昔隋內外
庶官政以依違而致禍亂人多不能深思此理當時皆謂禍不及
身面從背言不以爲患後至大亂一起家國俱喪雖有脫身之人
縱不遭刑戮皆辛苦僅免甚爲時論所貶黜卿等特須減私徇公
堅守直道庶幾相啓沃勿上下雷同也 貞觀政要




盡言勿怠

國朝成祖御西角門閱京官誥詞顧大學士楊士奇楊榮
金幼孜曰卿等三人及蹇尚書夏尚書皆先帝親任舊臣
凡朕所行有未盡善皆當盡言朕見人主一履帝位輒自
尊大惡聞直言雖素所親信亦畏威順旨緘默取容或賢
良之臣言之而不見聽亦退而絕口君臣之間各謂未享
富貴然未久皆至禍敗朕與卿等當深以為戒君臣一體
始終同心庶幾可以共圖利安遂取五人誥詞御筆增二
語曰勿謂崇高而難入勿以有所從違而或怠此朕實心
卿等勉之士奇等稽首云臣等其敢不勉上悅

皇明寶訓

宋高宗謂趙鼎曰胡安國所解春秋深得聖人之旨朕置之座右率二十
四日讀一遍朕以為人之常情必有所好或喜田獵或嗜酒色以至他玩
好朕自以為學書賢於他好也

通鑑




勵精圖治

國朝太祖謂侍臣曰朕夙興視朝日高始退至午復出道
暮乃罷日間所決事務恒默坐審思有未當者雖中夜不
寐籌慮得當然後就寢侍臣對云陛下勵精圖治天下蒼
生之福但聖體過勞太祖曰吾豈好勞而惡逸向天下未
寧吾饑不暇食倦不暇寢獎勵將帥平定禍亂今天下已
安四方無事高居宴樂亦豈不可顧自古國家未有不以
勤而興以怠而衰者天命去留人心向背皆決於此甚可
畏也豈容暇逸又曰朕代天理物日總萬幾安敢憚勞而
廢厥事卿等亦能各勤職業則庶事未有不理者

皇明
寶訓

唐陸贄勸德宗接下從諫乃上疏其畧曰上情不通於下則臣惑下情不通於上
則君疑疑則不納其誠惑則不從其令誠不見納則應之以悖令不見從則加之
以刑下悖上刑不亡何待是使亂多理少從古以然 通鑑總類



九重獻納

宋哲宗初卽位首詔司馬光爲相光進言曰天地交則爲
 泰不交則爲否君父天也臣民地也是故君降心以訪問
 臣竭誠以獻替則庶政脩治邦家乂安君惡逆耳之言臣
 營便身之計則下情壅蔽衆心離叛近年士大夫以偷合
 苟容爲智危言正論爲狂是致下情蔽而不能上通上恩
 壅而不能下達閭閻愁苦上不得知公私兩困盜賊以繁
 則天下之勢可不爲之寒心乎臣以今日所爲先下明詔
 廣開言路則嘉言日進羣情無隱陛下雖居九重四海之
 事如指諸掌舉措攸當此乃治安之原太平之基也

大學衍義補

唐太宗謂公卿曰靡麗珍奇固人之所欲若縱之不已則危亡立至朕欲營
 一殿材用已具鑿秦而止王公以下宜體朕此意由是二十年間風俗素朴
 衣無錦綉公私富給 貞觀政要



法古無欲

國朝太祖九年作親王宮止飾丹碧太祖曰惟儉養性惟
 侈蕩心居上能儉可以導俗居上而侈必至厲民獨不見
 茅茨卑宮堯禹以崇聖德阿房西苑秦隋以失人心諸子
 方及冠年去朕左右豈可使靡麗蕩其心又謂侍臣曰自
 古王者之興未有不由於勤儉其敗亡未有不由於奢侈
 前代得失可為明鑒後代昏庸之主縱欲敗度不知警戒
 卒瀕於危亡此深可慨歎大抵處心清靜則無欲無欲則
 無奢縱之患欲心一生則驕奢淫佚無所不至不旋踵而
 敗已隨之矣朕每惕然於心故必身先節儉以訓於下

皇明 寶訓

唐廣州都督党仁弘坐贓當死太宗宥之偶有自悔之明召五
 品以上謂曰法者人君所受於天不可以私朕私仁弘是自亂
 其法上負於天欲席藁於南郊三日進蔬食以謝罪群臣以為
 大過固請上降手詔曰朕有三罪知人不明一也以私亂法二
 也善善未賞惡惡未誅三也黜仁弘為庶人徙欽州 通鑿



賞罰兢惕

國朝太祖謂侍臣曰人言天子居至尊之位操可致之權
 賞罰予奪得以自專朕則不然凡出一言行一事兢兢業
 業惟恐上違天命下拂人情況賞罰予奪國之大柄一有
 愛憎忿戾於其間則非大公至正之道是以此心不敢須
 臾忽也又曰賞罰者國之大權人君操賞罰之權以御天
 下一本於至公故有功者雖所憎必賞有罪者雖所愛必
 罰賞以當功上不為德罰以當罪下不敢怨不以小嫌而
 妨大政不以私意而害至公賞功罰惡庶有以服天下之
 心侍臣對曰陛下持心若此太平長久之道也

皇明寶訓

唐太宗好持論古人究詰臧否劉洎諫曰帝王之與臣
 庶聖哲之與庸愚等級遠絕勢不倫擬陛下降慈旨解
 柔顏虚心聽納猶恐羣臣惴縮不敢進况以神機天辯
 飾辭援古而逆其議哉

白孔六帖



霽顏納諫

國朝太祖諭侍御史文原吉等曰比來臺臣久無諫諍豈
 朝廷庶務皆盡善抑朕不能聽受故爾默默乎爾等以言
 為職所貴者忠言忠言日聞有益於天下國家若君有過
 舉而臣不言是臣負君臣能直言而君不納是君負臣朕
 每思一介之士於萬乘之尊其勢懸絕平居能言奏對之
 際或畏避不能盡其辭或倉卒不能達其意故嘗霽色以
 納之惟恐其不盡言也至於言無實者亦畧而不究蓋見
 秦漢以來季世末主護短惡諫誅戮忠直積咎愈深夫日
 月尚有薄食人安能無過惟能改過便可成德矣

皇明
寶訓

晉文公出畋前有大蛇橫道御云請攻之公曰
 不可吾聞天子夢惡脩道諸侯夢惡脩政我有
 失行天招妖以警我攻之是逆天命也請於廟
 自厲吾罪與賢遂能章德行善居三日夢天誅
 大蛇公覺使人視之蛇已魚爛矣 賈誼新書



脩德弭災

傳曰天之愛民甚矣豈使一人肆於民上若乃司牧之重
 政治或失必示災祥以神警戒聖帝明王覩而脩德懼刑
 政之壅蔽則勤於聽納恐驕淫之易致則身先節儉憂億
 兆之未泰則矜微恤隱念賦役之尚繁則省財節用思忠
 賢之未進則寤寐遺逸慮邪佞之或邇則斥去羣小轉禍
 為福變災成祥惟德是輔其理何遠是以堯之水湯之旱
 大戊之桑穀高宗之雉雉皆明德格天至誠感神而咎徵
 自消妖不能勝矣武丁脩政行德天下咸歡殷道復興其
 明德者則脩長福泰惡德者則脩短凶災豈虛謬哉

册府元龜



宋孝宗謂輔臣葉衡等曰朝廷用人止論其賢否不可有黨如唐之牛李其
 黨相攻四十年不解皆緣主聽不明所以至此文宗嘗云去河北賊易去朝
 中朋黨難朕嘗笑之為人主者但公是公非何緣有黨

綱鑑

誠鑑衡物

夫人君以一人之身而御四海之廣應萬務之衆苟不以
至誠與賢而役其獨智以先天下則耳目心志之所及者
其能幾何是故人君必清心以蒞之虛已以待之如鑑之
明如水之止則物至而不能罔矣夫權衡設而不可欺以
輕重者唯其平也繩墨設而不可欺以曲直者唯其正也
我以其正彼以其邪我以其直彼以其僞何患乎邪之不
察佞之不辨一爲不誠則心且蔽矣而邪正何能辨乎是
故鑑垢則物不能察也水動則形不能見也已不明故也
且待物以誠猶恐其不能動也況不誠而能動物乎

理性



宋仁宗疾京師小兒會闕下燃首以祈福
日數百人有司不能禁將葬無老幼男婦
哭泣過哀皆由平日德政所感 後山談叢

百姓愛戴

周文王問太公曰天下一盈一虛一治一亂其君賢不肖乎其天時變化乎何如太公望云君不肖則國危而民亂君賢聖則民安而國治禍福在君不在天時文王曰古之賢聖可得聞乎太公云帝堯王天下上世所謂賢君也金玉不飾文錦不衣奇珍不視淫樂不聽不以役作害民耕織削心約志從事無為吏有忠正者尊其位廉潔者厚其祿民有孝慈者愛敬之農桑者慰勉之存養天下其自奉甚薄賦役甚寡故萬民富樂而無饑寒之色戴其君如日月親其君如父母矣文王曰大哉賢治之君也

太公六韜

漢匡衡與客論政朝廷者天下之楨幹也公卿大夫相與循禮恭讓則民不爭好仁樂施則下不暴上義高節則民興行寬柔和惠則衆相愛四者明王之所以不嚴而成化也 聖學心法



慎好率下

唐太宗謂侍臣曰古人有云君猶器也人猶水也方圓在器不在水堯舜帥天下以仁而民從之桀紂帥天下以暴而民從之蓋下之所行皆上之所好也至於梁武父子志尚浮華惟好釋氏老氏之教武帝頻幸同泰寺親講佛經百寮皆大冠高履談論苦空未嘗以軍國典章為意卒被侯景幽逼而殂孝元在江陵為萬紐于謹所圍猶講老子百官戎服以聽俄而君臣被執何乃宰衡以干戈為兒戲縉紳以清談為廟畧此事足為炯鑒朕今所好惟在堯舜周孔之道如鳥有翼如魚依水失之必斃不可暫無耳

貞觀政要

孔子讀易至損益卦愕然而歎曰夫自損者必有益自益者必有決之子夏避席而問子曰滿招損謙受益凡持滿而能久者未嘗有也昔堯居天下之位猶允恭以持之克讓以接下是以于歲而益盛夏桀昆吾自滿而無極充意而不節是以千載而惡著

家語



否泰損益

夫盡聖人之心者莫深於易其別卦也乾下坤上則曰泰
 坤下乾上則曰否其取象也損上益下則曰益損下益上
 則曰損夫天在下而地處上於位垂矣而反謂之泰者上
 下交也君在上而臣處下於義順矣而反謂之否者上下
 不交也天氣下降地氣上騰然後歲功成君澤下流臣誠
 上達然後理道立損益之義亦由是焉上約已而裕於人
 人必悅而奉上矣豈不謂之益乎上蔑人而肆諸已人必
 怨而叛上矣豈不謂之損乎是以古先聖王之居人上也
 必以其心從天下之心而不敢以天下之人從其欲

藝林粹言

唐宣宗嘗以太宗所撰金鏡錄授學士令狐綯讀至亂未嘗不
 任不肖治未嘗不任忠賢上止之曰凡求致太平當以此言為
 首又書貞觀政要於屏風每正色拱手而讀之

山堂肆考



遵法祖制

國朝成祖初年上視朝罷以建文多改舊制顧侍臣歎息
 變色曰凡開創之主其經歷多謀慮深每作事必籌度數
 日乃行亦欲子孫世守之故書云不愆不忘率由舊章此
 老成之言後世輕佻諂諛之徒立心不端以其私智小見
 改易祖法嗣君不明以為能而寵任之徇小人之邪謀至
 於國弊民叛喪其社稷者有之矣豈可不以為戒乃召進
 吏戶尚書張統王鈍卿二人久事皇考習知典故今皆老
 矣其解見職務月給尚書半俸居京師視時政有戾舊制
 者並向朕直言勿隱庶稱屬望老成之意云深矣

皇明
 寶訓

戰國時荀卿為蘭陵令嘗與臨武君論兵之要在附民夫仁人之兵上下一心三軍同力若子弟之衛父兄手臂之扞頭目故兵要在附民而已臨武君曰先生議兵常以仁義為本然則又何以兵為哉卿曰仁者愛人義者循理故兵者所以禁暴除害也非爭奪也綱目



文德威武

夫以仁義綏民者無敵於天下至於齊桓晉文之兵可謂入其城而節制矣然猶未本乎仁義之大統也故魏秦之武銳不足以當桓文之節制桓文之節制不足以當湯武之仁義故曰善師者不陣善陣者不戰善戰者不敗夫文德者帝王之利器也威武者文德之輔助也是故文之所加者深則武之所服者大德之所施者博則威之所制者廣主不可以無德無德則臣叛不可以無威無威則失權臣不可以無德無德則無以事君不可以無威無威則國弱是以聖主賢臣御世而仁義之師無敵於天下也

太平御覽

帝堯治天下五十載其仁如天其智如神就之如日望之如雲帝不知天下治與不治乃微服遊於康衢聞童謠曰立我丞民莫非爾極不識不知順帝之則又有老人含哺鼓腹擊壤而歌曰日出而作日入而息擊壤而飲耕田而食帝力何有於我哉 通鑑



甲子三風

卷之一

四一

君德如天

夫仁義者人主之術也一於仁天下愛之而不知畏一於義天下畏之而不知愛三代之主仁義兼隆所以享國長久爲宗社靈長之計惟見輔養上德而輔養之道非徒涉書史覽古今而已要使跬步不離正人乃可以涵養薰陶成就聖德君德天德也有此盛德故能上順天理下達人情無一事之謬一物之戾如天之高淵之深見而民莫不敬言而民莫不信行而民莫不說其聲名之洋溢無遠無近無內無外極天地之所覆載日月之所照臨霜露之所墜凡有血氣無不尊親故曰配天聖人之事盡於是矣

性理

漢文帝時南越尉佗自立爲帝上召佗兄弟以德懷之佗遂稱臣吳王詐病不朝賜以几杖張武等受賂金事覺更加賞賜以媿其心專務以德化民是以海內殷富興於禮義斷獄數百幾致刑措

羣書淵海




德禮政刑

夫人君爲治固在脩德以爲化民之本然人非一人地非一地人所稟者有偏全地所至者有遠近既化以德而有不一者必須有禮以一之然後吾之德化可行焉苟道之而不從化之而不齊非有法制禁令又不可也法制以示之於前禁令以約之於後彼猶悖理而梗化則刑罰之加焉烏可少哉孟子曰徒善不足以爲政徒法不能以自行有政刑而無德禮是謂徒法有德禮而無政刑是謂徒善爲政之道於斯四者誠不可缺一者也王法上承天道下順人情君臣以天行法而後下民以天相安也

大學衍義補

後漢光武時卓茂爲密令勞心諄諄視民如子口無惡言吏民親愛而不忍欺之政化大行帝詔云前密令卓茂能爲人所不得爲夫名冠天下當受天下重賞擢茂爲太傅封褒德侯

太平御覽



寶愛兆民

國朝太祖罷朝與羣臣論民間事太祖曰四民之業莫勞於農觀其終歲勤勞少得休息時和歲豐數口之家猶可足食不幸水旱年穀不登則舉家饑困朕一食一衣則念稼穡機杼之勤爾等居有廣厦乘有肥馬衣有文繡食有膏粱當念民勞大抵百姓足而後國富百姓逸而後國安未有民困窮而國獨富安者爾等其思佐政裕民之道庶幾食祿無愧又曰國家愛養生民正猶保抱赤子惟恐傷之苟無常制而惟培歛以腴其脂膏雖有慈父不能收愛子之心故曰元后作民父母尔等其體朕至懷

皇明寶訓

宋孝宗時皇太子始就外傳遴選學官以樓機等兼資善堂小學教授機日陳正言正道又以累朝事親脩身治國愛民四事手書以獻太子置之座右朝夕省覽多所裨益

羣書淵海



輔翼良規

古之王者太子乃生明孝仁禮義以道習之選天下之端
 士有道術者使與居處見正事聞正言行正道夫三代之
 所以長久者有此具也孔子曰少成若天性習慣如自然
 習與智長故切而不愧化與心成故中道若性鄙諺曰前
 車覆後車誡天下之命懸於太子太子之善在於蚤諭教
 與選左右夫心未濫而先諭教則化易成也教得而左右
 正則太子正而天下定矣噫太子君之二也上有宗廟社
 稷之事下有四海烝民之望前有祖宗垂創之艱後有子
 孫長久之計使大本正然後可以保國家一天下矣

綱目

宋太宗以李至李綱兼太子賓客至等入謝帝謂之曰朕以太子仁孝賢
 明尤所鍾愛今立為儲貳以固國本常賴正人輔之以道卿等可盡心調
 護以贊成之勿因循而從順也至於詩書禮樂之道裨益太子者皆卿等
 素習不暇朕多訓耳

若監



論學諭輔

國朝成祖七年二月上諭春坊大學士黃淮左諭德楊士奇曰朕命爾等輔東宮監國東宮天性仁厚識見端正嘗一日侍側朕問講官今日說何書對云論語中君子小人和同章因問何以君子難進易退小人易進難退對云小人逞才而無恥君子守道而無欲又問何以小人之勢常勝對云此係上之人好惡如明主在上必君子勝矣又問明主在上都不用小人乎曰小人果有才不可棄者須常警飭之不使有過可也朕彼時甚喜其學問有進爾等其各盡心輔之毋負朕簡任之意黃淮楊士奇皆頓首

皇明寶訓

周成王問於史佚曰何德而民親上對云使之以時而敬順之忠而愛之布令信而不食言如臨深淵如履薄冰王曰懼哉對曰天地之間四海之內善之則臣不善則讐也 通鑒



事天勤政

國朝太祖諭皇太子曰君道以事天愛民為重其本在敬身人君一言一行皆上通於天下係於民必敬以將之而後所行無不善也蓋善天必鑒之不善天亦鑒之一言而善四海蒙福一行不謹四海罹殃言行如此可不敬乎太祖又訓其諸王子曰昔有道之君皆身勤政事心存生民所以保守天下至其子孫廢棄厥德色荒於內禽荒於外政教不脩禮樂崩弛則天棄於上民離於下遂失其天下國家為吾子孫者當取灋於古之聖帝哲王兢兢業業日慎一日彼荒淫勿蹈其轍可以長享富貴矣 皇明寶訓

隋李綱為太子洗馬一日太子勇宴客左庶子唐令則奏琵琶綱曰令則官調護乃自比倡優惑視聽請正其罪後勇廢文帝切讓官僚無敢對綱獨云陛下不素教故太子至此太子中人資耳奈何令歌舞鷹犬織兒使日侍側帝曰朕過矣 問奇類林



保傅芝蘭

唐太宗謂侍臣曰太子保傅古難其選成王幼小以周召
 為保傅左右皆賢足以長仁育德致理太平稱為聖主秦
 胡亥以趙高作傅教以刑法誅功臣殺親戚不旋踵而亡
 人之善惡誠由近習朕弱冠交游惟柴紹竇誕等為人既
 非三益所損實多朕居寶位經理天下雖不及堯舜之明
 庶免乎孫皓高緯之暴魏徵云中人可與為善可與為惡
 上智之人自無所染陛下受命自天平定寇亂救萬民之
 命理致升平豈紹誕之徒能累聖德經云放鄭聲遠佞人
 雖有聖哲之資左右近習尤宜加慎防之太宗曰善

貞觀政要



宋仁宗御適英殿出危竿論以述居高謹危之意呂大防劉摯等釋之云人君
 居高須用正直之人譬如危竿須用正直之木古人謂邪蒿人君不可食食之
 固無害以其名不正也况用邪佞小人乎 山堂肆考

中正萬善

國朝仁宗元年賜皇太子圖書諭曰朕惟祖孫父子於天
 倫最重其親愛莫加焉推明長保富貴壽康之道以期之
 者聖人之心也付以社稷人民之重人之行莫大於中正
 沉人之上者乎人主中正四字為寶皇太子者天下之本
 中正體用萬善皆原於此人以中正存諸內則發於喜怒
 哀樂無非道也以中正施諸行則形於動靜無非德也以
 中正誠身則身尊治家則家齊惟中正之人是親則君子
 益進小人益遠則治道可成萬姓服而四夷效順君人之
 道莫此為要爾懋敬服膺之宗社生民之望永遠哉

皇明寶訓

宋太宗戒陳王元僖等曰汝等生長深宮民庶艱難人之善惡皆恐未曉每看
 一衣則憫蠶婦每餐一食則念耕夫至於聽斷之間勿任喜怒禮接羣賢無非
 求於啓沃先賢有言曰逆吾者是吾師順吾者是吾賊不可不察也 進鑒



視聽親賢

國朝太祖謂皇太子曰人君統理天下人情物理必在周知然後臨事不惑吾自起田間至於今日凡治軍旅理民情無不盡心恒慮處事未當故嘗思念古人為治必廣視聽凡言之善者吾即行之不善者吾雖不行亦思繹至再果不可行然後置之夫慮事貴明處事貴斷庶幾不眩況爾生長宮掖未涉世故聞見不踰於闕庭而欲以智識決天下之務使之一一當理難矣汝宜親賢樂善以廣聰明逆已之言必求其善順已之言必審其非如此則是非不混理欲判然天下之事可得而治矣汝其敬之

皇明寶訓

唐太宗自立太子遇物則誨之見其飯則曰當知稼穡之艱難見其乘馬則曰當知負乘之勞苦見其乘舟則曰水所以載舟亦所以覆舟民猶水也君猶舟也見其息於木下則曰木從繩則正后從諫則聖通鑒



敬畏守成

國朝太祖謂皇太子曰天子之子與公卿士庶之子不同
公卿士庶之子係一家之盛衰天子之子係天下之安危
爾承主器之重將有天下之責也公卿士庶人不能脩身
齊家取敗止於一身一家若天子不能正身脩德其敗豈
但一身一家之比將宗廟社稷有所不保天下生靈皆受
其殃太祖又諭曰帝王得國之初天必授於有德者然必
頻履憂患而後得之其得之也難故其憂之也深若守成
繼體之君常存敬畏以祖宗憂天下之心為心則能永受
天命苟生怠慢危亡必至可不懼哉可不戒哉

皇明寶訓



唐太宗時劉洎奏太子宗祧是繫漢鼎錯上書令通政賈誼奏計務知
禮教古者問安而退以廣敬也異宮而處以遠嫌也太宗勅洎岑文本
馬周通曰直東宮 天中記

歷儲繼統

國朝太祖命羣臣大小政事皆先啓皇太子處分然後奏
 聞因謂太子曰人君日有萬幾一事之得天下蒙其利一
 事之失天下受其害惟創業之君歷涉勤勞達於人情周
 於物理守成之君生長富貴若非平昔練達臨政鮮有不
 謬者故特命爾日臨羣臣聽斷諸司啓事以練習國政惟
 仁則不致於躁暴惟明則不惑於邪佞惟勤則不溺於安
 逸惟斷則不牽於文法凡此皆以一心爲之權度吾自有
 天下以來於諸事務惟恐毫髮失當以負上天付托之意
 戴星而朝夜分而寢爾能體而行之吾無憂矣

昭代典則

東漢靈帝時皇甫嵩遷冀州牧奏請一年租稅
 以賑饑民帝許之百姓歌曰天下亂兮市爲墟
 母不任子兮妻失夫賴得王甫兮復安居

山堂肆考




問苦賜食

國朝成祖十八年洪熙為皇太子過鄒縣見民男女持筐盈路拾草實者駐馬問所用民跪對云歲荒以為食皇子惻然稍前下馬入民舍視民男女皆衣百結不掩體竈釜傾仆不治歎曰民隱不上聞顧中官賜鈔而召耆老問所苦具以實對輟以所食賜之山東布政使石執中來迎責之曰汝為民之牧而視民窮如此亦動念否乎執中言凡被災之處皆已奏乞停今年秋稅太子曰汝往督郡縣速勘饑民口數悉發官粟賑之事不可緩執中請人給三斗太子曰且與六斗汝無懼擅發廩吾見上當自奏也

皇明寶訓

楚莊王聽朝罷宴樊姬下殿迎曰得無饑倦乎王曰與賢者語不知饑倦姬問云賢為誰王曰虞丘子也姬笑云虞丘子相楚十餘年未聞進賢退不肖恐未必賢王以姬言告之虞丘子慚甚乃薦孫叔敖為令尹楚國大治

烈女傳



后宮良佐

唐長孫文德皇后性仁孝儉素好讀書嘗與上從容商略古今事因而獻替裨益弘多后得疾太子請奏赦罪度人入道后曰死生有命非智力所移赦者國之大事不可數下道釋異端之教蠹國病民上素所不為奈何以吾一婦人使上為所不為乎疾篤與上訣曰房玄齡事陛下小心慎密苟無大故不可棄也妾之本宗非德慎勿處之權要妾生無益於人願勿以丘壘勞費更願陛下親君子遠小人納忠諫屏讒慝省作役止遊畋則妾死不恨矣上悲慟入宮自後不復聞規諫之言歎曰從此失吾一良佐

綱目

漢鄧禹女曰綏性孝友常晝脩婦業夜誦經典選入宮為貴人恭肅小心動有法度嘗有疾和帝命其母兄弟入親醫藥辭曰外舍出入內庭上令陛下有私幸之訊下使賤妾獲不知足之謗上下交損不願也及册立為皇后帝欲官爵鄧氏后輒哀請謙讓故兄隲終帝世不過虎賁中郎將

皇書淵海



世守忠義

唐穆宗四年上餌金石之藥時有處士張臯曰夫人之身
 神慮澹則血氣和嗜欲勝則疾疹作夫藥以攻疾也若無
 疾則不可餌也借使有疾用藥猶須重慎而況無疾乎庶
 人尚爾況天子乎上善其言而求之不已既而疾作宦官
 欲請郭太后臨朝太后曰昔武后稱制幾傾社稷我家世
 守忠義非武氏之比也太子雖小但得賢宰相輔之卿輩
 勿預朝政何患乎國家不安也且自古豈有女子為天下
 主而能致唐虞之理者乎取制書手裂之太后兄太常卿
 釗密上太后牋曰若果循其請帥諸子納官爵歸田里

目細



齊桓公逐白鹿至麥丘遇一叟年八十有三桓公曰美哉與之飲公曰以叟之壽祝寡人矣叟
 奉觴云五君固壽金玉之賤人民是寶桓公曰嗟哉祝平寡人聞之矣 太平御覽

聞善能悅

晉文公逐麋而失之間於農夫老古吾麋何在老古以足指之云如是往文公曰寡人問之以足指何也老古振衣而起云一不意人君如此虎豹之居也厭閒而近人魚鱉之居也厭深而之淺故諸侯厭眾而亡其國詩云維鵲有巢維鳩居之君放不歸人將居之於是文公恐而歸之遇樂武子武子云獵得獸乎而有悅色文公曰寡人逐麋失之而得善言故有悅色樂武子云其人安在公曰吾未與之來也武子云居上位不恤下驕也緩令急誅暴也取人之言而棄人盜也文公曰善遂還載老古與俱歸

古今遺史

唐李德裕云人君之德莫大於至明明以照奸則百邪不能蔽漢昭帝是也周成王有漸德矣

通鑒刪要




識辨賢邪

夫欲理天下而不務於得人則天下不可理矣欲得人而不辨君子小人則人心不可得矣務辨君子小人而惡其言過悅其順已則君子小人不可辨矣趣和求媚人之甚利存焉犯顏取怨人之甚害存焉居上者易其害而以美利利之猶懼忠告之不既況有疎隔而勿接又猜忌而加損者乎聖人知衆之不可以力制也故植誹謗木陳敢諫鼓列爭臣之位以宣其言尊禮義安誠信厚賢能之賞以歸其欲使上不至於亢下不至於窮則人心安得而離亂兆何從而起古之無爲而治者其率用此道歟

藝林粹言

商武丁嗣立恭默思道夢上帝賚以良弼乃使人以形旁求於天下說爲胥靡築於傅巖求得之命以相進諫論列天下之事君臣道合政事脩舉綱鑿大成



君臣貴遇

夫治亂運也窮達命也貴賤時也故運之所隆必生聖明之君聖明之君必有忠賢之臣其所以相遇也不求而自合其所以相親也不介而自親唱之而必和謀之而必從得失不能疑其志讒構不能離其交然後得成功也其所以得然者豈徒人事哉授之者天也告之者神也成之者運也張良誦三畧之說以遊於羣雄其言也如以水投石莫之受也及其遭漢祖其言也如以石投水莫之逆也非張良拙說於陳項而巧言於沛公也然則聖人所以爲聖者蓋在乎樂天知命故遇之而不怨居之而不疑也

唐類函

夫治亂運也窮達命也貴賤時也故運之所隆必生聖明
之君聖明之君必有忠賢之臣其所以相遇也不求而自
合其所以相親也不介而自親唱之而必和謀之而必從
得失不能疑其志讒構不能離其交然後得成功也其所
以得然者豈徒人事哉授之者天也告之者神也成之者
運也張良誦三畧之說以遊於羣雄其言也如以水投石
莫之受也及其遭漢祖其言也如以石投水莫之逆也非
張良拙說於陳項而巧言於沛公也然則聖人所以爲聖
者蓋在乎樂天知命故遇之而不怨居之而不疑也

唐類
函

